



秋崖先生小藁卷之十一

方岳

巨山

啓

通州府年書

閭闔開黃道聿新鳳曆之元燕寢凝清香誕輯虎符
之瑞春融族管頌浹椒盤某官氣函玉燭之和識造
璣衡之妙昔無襦而今袴汗青遄紀於竹書言如絲
而出綸泥紫已塗於芝宇地天之泰朝野所需某三
見媿訾一歸塊北雲深戟衛諒鳴璆蟻泛之春日轉
觚稜覲鏘珮鷄人之曉中和之詠熙皞惟均

通通判

春皇撫宇宙聿新鳳曆之元霽色滿乾坤誕輯熊羆



之瑞雲酣族管香沁椒盤某官氣函玉燭之和識造
璣衡之妙治中半刺史喜光風霽月之平分新安古
富州覺練水屏山之增麗於皇渙渥式對泰亨某三
見娜訾一歸塊北暖融泥軾諒鳴琴蟻泛之春晴轉
觚稜覲鏘珮鷄人之曉康沂之詠屬邑惟均

通教授

春皇撫宇宙聿新五鳳之元霽色滿乾坤誕輯三鱣
之瑞雲酣族管香沁椒盤某官發括山煙雨之奇滉
石門洞天之秀捕龍蛇搏虎豹駭觀昌黎竒怪之文
騎麒麟翳鳳凰雅有周公太平之畧倚歟紫綉美彼
青規某遙溯匿犀敢忘傳鯉先生自此升矣春浮栢
葉之觴館下立而誨之雲麗槐陰之市衷丹所屬楮

素奚殫

通幕職

經謂一爲元珪曆更新於簇管陽內三爲泰瓊琚盛
集於蓮池時若青規誕敷紫綉某官識造璣衡之妙
氣函玉燭之和幕府粹清不妨尋練水屏山之勝江
城寒沉豈久稽粉闈瑣闥之遊肆及正陽渙流春澤
某陸沉僚底三易歲端浮蟻沁柏葉之香莫塵燕厦
朝馬踏梅花之月遄覲鵷墀其若衷丹難窮楮素

回王知軍

青旗催曉適新鳳曆之端皂蓋班春誕輯虎符之瑞
某官慶流戟衛息浹邊城式遄尺一之需懋對茂三
之泰某濫塵烏幕肅奉魚書遙瞻竹使之華已後椒

花之頌

回諸縣

蒼龍易次青鳥司辰
遶新花縣之春於穆椒盤之頌
某官政成三異仁及一同懋迎寅令之和丕輅庚牌
之召某未遑削牘猥辱飛緘願言調單父之音相與
布正王之澤

回立憲

彼美青旂肇布王春之令於皇繡斧誕敷帝皞之仁
芝函與珪曆俱新簇管並玉花齊瑞某官奉行寬大
遠有光華一氣轉洪鈞催攬澄清之轡九天開黃道
遶歸禁近之班喜聞櫪馬之喧共俟詔鷗之下某又
逢穀旦載頌椒盤分淮海之陽和有來雲朶搖覽湖

之明月徒想風期

回吳總侍

風轉青旂肇布王春之令天開紫橐誕敷帝皞之仁
遶有蕃釐介茲茂德某官星避南斗筆回東風才名
當世之少雙上虛佇之久矣江山天下之第一民歌
舞者再焉及此端辰聿來異數盍簪而喧櫪馬想忻
奉於潘輿飛墨而落詔鷗竚趨歸於漢殿某又逢穀
旦載頌椒盤北固樓臺正隔濤江之雪東皇宇宙幸
連淮海之雲願言節宣昭受渙溼惟精調於鼎食惟
亟尉於巖瞻

回潘宰

閭闔天高蒼籙開而一元始河陽地暖洪鈞轉而萬

象春維時履端既多受祉某官大簇之動孟陬之和
妙彈單父之琴遄歸鳧馬徑造承明之殿親發獸樽
某自放還山久不蓄饋壽之栢酒無手版之倒持寫
以竹書有背芒之若負

回景獻邸

輦路春回初唱鷄人之曉藩房天近聿開麟趾之祥
恭惟與時偕亨維德是懋玩聖經之五始學以日新
會春王之三朝道隨元長地天之泰宗國同休某猥
乏見聞繆陪講習聞命幾何日矣乃今方堂帖之頒
徃見猶未能焉是以後賓榮之賀

賀范丞相

鳴閣奮庸肇登宰揆麟經書始遄屆王正一元隨萬

化皆春羣動與三陽交泰共惟以大學爲相業以無
逸爲廟謨積陰開除形聲和而天地應衆正興起元
首明而股肱良有偉蒼祗歛時皇極某仰瞻翹館迥
隔叢霄新年賀太平共喜洪鈞之轉陽春布德澤式
顯寒谷之吹

荅程教賀正

歲在作噩天開用九之乾正于孟陬春洽內三之泰
聿來墨詔起我筆峯共惟有秘畫前無虛名下騎長
鱸而訪白將薄遊芥水之宮駕飛鳳以凌清當徑上
芸香之閣橫經何日用易一元某雲卧草亭風傳椒
頌千金裘五花馬莫酌樽酒之細論尺素書雙鯉魚
但愧故人之遠意

谷景獻邨

歲紀旃蒙丕對一元之始晨趨閭闔有開萬象之春
於穆青陽介時朱邸恭惟制行信厚秉心塞淵識參
義易之占履而後泰學謹麟經之法正次於王與宗
國以同休交天地而錫羨某嘗陪講席敢後慶函闕
矣晤言恍三山之如舊尚其問學與六籍以維新

秋崖先生小藁卷之十一

秋崖先生小藁卷之十二

方岳

巨山

啓

賀曹常鄉

某伏讀贊書諗躋宗伯文章宿老寧久法冠禮樂清
鄉有華儒几蓋所謂景星鳳凰之瑞夫豈樂秋天鷗
鷗之爲乃咨秩宗新我頌典當使文物聲明之盛無
慙太平經制之書上意則然吾道幸甚某出無僮馬
坐隰顛犀招諸生齊魯之間則俎豆聞之矣致吾君
堯舜之上豈玉帛云乎哉嗣有綸言奚爲縣蕤

賀呂宗鄉

恭審擢從烏府董正麟宗上帝鑒觀四方獨系隆於

我宋文王本支百世思篤叙於吾儒乃咨蹇蹇之王
臣糾合振振之公姓是皆法從有偉名卿非熊非羆
非虎非龜公望久矣如圭如璧如金如錫人快觀之
式顯詔草之頻增我社粉之重某喜於賀厦出則無
車猶未免鄉人豈惟可太息者六恥獨爲君子所賴
有達尊之三敢不彈冠倚須聽履

賀范尚書

伏讀贊書諗躋常伯大司空掌邦事頽觀風俗之淳
老成人有典刑自繫朝廷之重蓋以孔氏中庸之學
能立周家太平之基詔曰予虞時維汝翼謂朝不信
道工不信度允藉納言然入則有保出則有師薄聞
後命某彈冠以喜望履未遑歸來乎出無車亦正坐

馮歡之歎告之曰行有日且將送韓愈之窮敬竚遠
離亟彈欣豫

賀吳閣學

伏觀邨函顯躋冊府二三謨典於皇繼序之傳百萬
甲兵增重提綱之寄遠通班於曳履殆舉國以彈冠
抑人有言方時多事共慨四郊之多壘遺君父憂誰
爲萬里之長城衛行在所表裏正茲於外禦本根尤
急於內寧惟浙東西在帝左右旣久狃安於畿甸曾
微穿朽之干戈顧今當艱難之時安可習承平之故
乃陞延閣誕詰戎兵雖以文章鳴國家固吾君之親
擢然而忠信爲甲冑非真儒而孰歸行矣登庸式宏
經濟某隔茲衣帶之水莫旒簪纓之塵丕顯哉文王

謨喜峻直西清之邃歸來乎太公望豈久爲北固之
遊側耳思言馳心丈席

賀吳尚書

伏審峻陟文昌併提戎律統六師平邦國已折佛狸
窺江之萌方千里曰王畿要有虎豹在山之勢茲惟
上意允屬我公某嘉與薦紳誦傳綸綍今日之功成
於一儒者豈但羞武夫之顏長江之險可敵十萬人
自足破胡人之膽言觀王佐式濟時艱

賀程恭父

伏審令嗣凱奏橋門謹傳里閭鵠袍園聽已觀一半
之青犧畫橫陳遄解兩優之褐不負金籬之教子共
矜璧水之得人某辱在契家白之叔氏仲孺有服難

歸賀慶之臚阿戎共談敢代緘勝之臆其如雀躍莫
旣魚傳

賀徽倅葉校書

伏審夙駕緹屏聿臨練帶新安之山水大好要識行
秘書別駕之風月平分豈但半刺史聊復爾耳能久
此乎恭惟獨抱遺經追配古作故能奪多士之氣取
象魁三蓋嘗登太微之庭去天天五胡以獲麟之筆
而監無懈之州如聞此來有欲爲王留行者雖曰小
屈焉能使予不遇哉願紬金匱之藏亟侍玉皇之案
某柳橋一別苦塊三年素鞞已終曾索長安之米青
山無恙竟回剡曲之舟自憐黍谷之難春能到草堂
之幾日隔曲江之面幾若避於燕鴻寄盛山之詩尚

相忘於鷗鷺

賀葉秘書

竊詗宣室興思道山入直獨提麟筆兼史氏之三長
寢迄鰲葬異元都之再至每嘆南省第一人之選胡
爲東藩半刺史之淹盍歸乎來公論則爾恨見之晚
上意可知茲特起於借塗會立登於要路某辱居榜
下每在談間石渠天祿之得人爲斯文喜巖暝林靡
之留我有老圃存敢竊問於行期容重陳於別悃

賀景獻郎

恭審眷隆外郎思錫中閨石窳脂田都小君之美號
金花羅紙煥公族之殊榮壺則維嘉人倫以厚恭惟
學請而德益進身正而家自齊親親賢賢不曰諸侯

王之子夫夫婦婦要皆士君子之風是有柔儀聿來
徽數某濫塵經席欣覩綸函雖微詩禮之漸磨但敬
閨門之雍穆

賀韓寺丞

伏審出綸中禁提舶外臺聞廟堂選士大夫之廉惟
君侯可念郡國奪慈父母之愛如吾民何故其依戀
昔山情所以慶快者公道獨喜紫陽之大振必爲黃
山而小畱某三逕已荒二天猶在想鄉人卧轍共思
煙簑雨笠之春然舉世貪泉敢爲浪舶風帆之賀

賀王吏部

新安人銓郎

伏審使符作牧兵衛在行太微二十五星郎潛華甚
新安三十六岫公望久之敢告前驅寬予後至恭惟

淵深七澤洞達四窓早登詞翰之場如驅龍蛇而搏
虎豹自典文書之皮已騎麒麟而翳鳳凰方飄飄然
道家蓬萊之山殆駸駸乎其泉侍從之橐乃遡湖陰
而出節旋分邸寄而易麾豈其愛江水之至清淺深
見底或者念歲惡之不入農末皆傷誰手摩之民瘼
甚矣抑恐君相之意不先一州其歸報政之成寧淹
五月行春近只見晚謂何某白首寡諸青山獨徃昔
侍同朝甚喜已勝萬戶之侯封今受一廛爲氓真是
二天之我有敢無扣角仰跂巾車

賀程右司

徽人

伏審三節星馳九閔天近每慨吾鄉之氣數誰在帝
傍有如我公之聲光亦勞使傳久當召矣無以歸兮

諒自茲不出於都城將盡還大好之山水若文昌若
內翰不曰同姓爲近乎有丞相有樞臣則固易地皆
然耳切幸明公之袞袞頓回吾郡之寥寥某未免鄉
人欣聞邸報君命召不俟駕敢問行期帝賚弼用作
霖遄觀制可

賀蔡憲

伏審饗廟之日召環自天貫索星沉已底祥刑之績
絲綸詔下聿聯法從之班恭惟親得考亭之傳是爲
名父之子政事自學問中出孰能禦之文章與氣節
相高又其餘者雖以蹇蹇而去國所謂拳拳於愛民
豈不爾思上固聖神之主取以自近朝多直諫之儒
其即問塗當毋埃駕某誦言盈耳喜懼交懷寧勿躍

然相傳司馬公用矣焉知來者能為李將軍地乎增
結私情敢忘公賀

賀吳總侍

伏審虎節建臺龜符抵籀大小馮之相代豈惟圖盛
事於衣冠東西總之迭為茲用分顧憂於旒宸有美
江山之第一共嘉國士之無雙波神胥舞於鷁舟春
氣肇開於鵲印歌謠載道想續劉常棣之碑香火滿
城當封寫凌煙之像斯民樂只於帝念哉某朋友同
倫兄弟異姓願言思伯訪戴之興勃然豈無他人依
劉之志遂矣式猷錫瓊之珮晤言浮玉之山追數平
生莫踰此喜

賀李運使

伏審內班即潛外將使指參大都督軍諮之重為小
朝廷人物之英簡在帝心聿寧江面恭惟赫矣龍門
之望隱然虎石之威規姚姒而逮莊騷豈但語言之
妙引夔龍而陳堯舜雅知籌策之良適戎馬之縱橫
賴木牛之飛輓乃進班於武部罷轉餉於兵屯文之
虎人之龍盍侍玉皇於香案東有猗西有虺乃煩金
節於江城言觀竹帛之勲亟下絲綸之詔某切依襟
帶頭拜履絢貌貅宿萬竈之煙敢忘共濟鷓鷖集九
霄之曉政恐遄歸仰止高山有如此水

秋崖先生小藁卷之十三

方岳

巨山

啓

賀袁太監

恭審渙發綸函晉陞繕監帝曰茲維師匠入紬金匱
之書時則有若儒宗無負玉墀之對夫以海內寡二
之學蚤收天下第一之科十年而到鳳池竊以為晚
五工之居雉正其謂斯何獨喜端人之登可為清朝
而賀恭惟緒守絜齋之訓親得慈湖之傳吾之心即
周孔之心曾何求於紙上所謂道非堯舜之道不以
陳於王前方其發諸詞章初無意於科目九萬里而
風在下奚計修程三千字而日未斜特其餘事出用

於世欲行所言第觀使指之將明夫豈儒效之迂闊
乘輅而講荒政溺由已溺飢由已飢駐車而談聖經
仁者謂仁智者謂智洪惟箕翼之魁宿端是青齊之
福星蓋其所懷之春或者不言而化人皆憚汲黯此
聲在江之東上不見賈生有詔自天而下若曰咸五
登三欲帝萬世鄉其襲六爲七作末一經不然營繕
之勞曷究彌綸之蘊某不量其贛敢誦所聞竊惟古
之共工皆有關於世變如制度之先樸將風俗之再
淳作大匠箴而獻諸朝尚何容喙讀梓人傳而知爲
相所碩留情

賀高秘書

未入

伏審綸綍起家旌麾載道帝讀蓬萊集歎其久去於

紫微天開會稽圖何至獨私於綠野妙有春風之句
雅宜煙雨之樓恭惟學該玉府之深藏筆捲銀河而
倒瀉舒翹揚英輻輳宇宙二十八宿之羅胸疏條緝
緯貫穿古今千數百年之在目上帝自留而論譔太
乙下觀其校讐襲六爲七作一經無紙上已陳之語
自甲至丁凡四庫皆腹中有本之書方片雲遊物外
之心俄半夜動席前之問涇乘剡雪坐嘯括山此所
謂行秘書耶昔公安在如欲用真學士者舍我其誰
其髮種種以驚秋意寥寥其厄閨雖乏盍公清淨之
助當驅兒童立馬以迎郊如聞王褒中和之章喜與
父老買牛而耕墅

賀新守入郡

恭審肅駕朱幡儼臨畫戟先聲戒曉鼓角爲之精明
粹氣浮春山川至於翔舞嘉與父老聳觀教條恭惟
以赤城之仙班傳紫垣之相印惟有是父有是子勲
名肆邁於常平其使吾君使吾民風俗再淳於堯舜
敢謂三十六峯之秀迺得一二千石之良視篆云初
置郵以喜其待將軍之約束前屬吏之驅馳登堂而
宣上德音坐見太平之官府下車而問民疾苦敢稽
簡靜之文書

賀謝刑部

恭審慶覃慈宸恩輯勲階天近兩輔親見五三之盛
泥香十錦式華千一之逢帝綈斯皇侯藩增重恭惟
昭回象緯峻極嶽靈如古大臣以所學乃伊周之學

思昔先正使吾君爲堯舜之君惟天佑于我邦將世
濟其賢業所謂金薤琳琅之美凜然玉壺冰露之寒
班紫禁之早朝疇不曰相門之相賦黃山而晚對何
獨爲詩人之詩方春洽於燕香屬祥開於鼇極七十
古希有誕揚玉冊之暉二千石維良丕對瑤林之彥
肆繇明陟入奉都俞其嘉與斯民共陶熙旦厦成而
燕雀賀密依使竹之華韶作而鳳凰儀共宴毋桃之
壽

賀趙大資

恭審誕播制函峻班書殿真儒無敵於天下帝其寬
北顧之憂此虜已在於目中時則有東歸之喜於皇
王佐允穆宗工恭惟識際天人勲在社稷蜚聲輶轄

於五緯有管夷吾則何患爲著書羽翼乎六經皆孔
安國所未到者惟其平生不爲紙上之學以故倉卒
能吐胃中之竒屬犬羊之不天鼓狻猊而畧地顧何
負於漢賊折尺箠而笞之所未下者聊城不遺鏃而
歸我方爲宗國無窮之計盡復寧人有指之疆誓將
挽九河以洗氛埃詎曰畫一江而限夷夏皇靈斯赫
儒效豈虛言觀疇昔之所成奚至今日而未相繫股
肱之寄在忠力當據坐論之謨然道德之威成安強
正賴折衝之畧特異優崇之典陞華禁邃之庭增重
麟符眡儀鷓閣詞掖下絲綸之制蓋一命再命三命
而益恭太常兼鍾鼎之銘其大書特書屢書而未已
丕視功載厥有彝章靈夏未服而韓相行共倚琯戈

之重貝州旣平而潞公入遯觀几烏之還某嘉與斯
人鋪時偉績藏在盟府夫誰曰彭越之同功訊之司
宗抑豈比汾陽之異姓式僕介圭之覲具隆巖石之
瞻聞邊吏之戒殘胡洗甲兵而不用謂中國之相司
馬讀制冊而可知仰斗之私與江俱下

賀謝刑部

伏審陞華寶宇移填玉山碧草綠波殊鬱懋棠之父
老朱幡皂蓋已歌騎竹之兒童安得一語借寇君於
帝前正恐兩州爭杜公於境上去思之極喜躍伊何
恭惟書府斗牛相門星鳳夢池塘之草家自有於詩
聲鄙堦砌之蘭世共推於儒傑思昔先正時維鉅公
使吾君爲堯舜之君今猶被於宗社以所學皆周孔

出郡

望

之學端復在其子孫獨先生自取之廉有識者見謂
之屈婁乞一麾而去遄飛五袴之誣方茲蹈德而詠
仁柰何奪此以與彼雖未覺雲霄之迥已頓驚分野
之殊恐開藩之未間不俟駕而歸覲前有召父後有
杜母賴拊摩凋瘵之餘坐而堯言進而舜趨竚獻納
熙恬之盛某猥誤衮褒之辱每虞錦製之傷鳴鳳凰
於高岡式徯九苞之瑞世徙鯤鵬於溟海莫隨六翮
之培風

賀高運使

伏審輟自鵷墀誕分虎節引星辰於碧落有開蜀道
之天將禮樂之皇華不遠長安之日竊窺帝意深有
廟謨若曰當宁思古名臣其維武侯爲時王佐每讀

出師之表無慙伊訓之書雖吳魏自裂而三分豈漢
賊可岐而兩立草廬所蘊竹簡莫傳蓋卧龍之蟄匪
徒然繫流馬之運其小者乃睠西土而凜有遺跡寬
予北顧者詎無若人幸今天道之好還大快人情之
共憤何止扼亢而拊其背已焚老上之庭恨不食肉
而寢其皮爰戮防風之骨然亡胡之未幾方鄰鞞之
可憂試以唐書與五代史而攷之其見於中國亦三
百年而餘矣旣犬羊之相啗曾蛇豕之無厭如使狂
嗥於封域之間奚啻鼾睡於卧榻之側吾恐患方深
耳見謂一秦之復生公其起而圖之縱無百參而何
缺若然則朝家之委寄夫豈惟使者之將輸聞之縉
紳偉哉綸綍恭惟道山蓬萊之曾次楚澤雲夢之筆

端當其排閭闔而呈琅玕信已跨崑崙而餐沆瀣迺
煩視草出以飛芻意者復周土宇而興六月之師其
必張漢天聲而決千里之勝飽吾貔虎取彼鯨鯢折
尺箠而笞之不留賊以遺君父無隻輪之返者迄安
邊而立功名使鼎湖弓劍之藏與渭上衣冠之廟王
氣開而天地闢妖氛掃而河洛清則多多益辦之勛
皆陳陳相因之助以故誦言乎諸葛不復比數於蕭
何某布所聞匪爲之佞逢此盛舉未嘗不歎曰江左
之有夷吾遲之幾何將亦相戒以中國之相司馬惟
抵掌而談天下之事敢折腰而及吾身之私其若翹
瞻莫殫忻頌

賀李制帥

恭審誕開制閩居守留臺南浦雲飛虎節占使星之
動北門天近麟符分卿月之暉於皇玉壘之威增重
金陵之勢帝意若曰時方顧憂盜亦吾民何至帶牛
而園起韃爲黠虜幾欲牧馬而內窺使長江得人如
孤羆之據深叢則絕漠之域寧匪兇而率曠野繼我
宗彥維時人英恭惟風神肖老聃之仙文物孕長庚
之秀維弼畫河朔十三策每慨然於俎豆雍容之時
而敢爲小范有胷中百萬兵雖投之於羽檄交馳之
地而不亂粵從鶴陞出擁蜺旌遂令落霞飛鷺之墟
蔑有明月吠龍之警乃睠陪京之重適司留鑰之嚴
俾盡護於列營諒聳聞於遐裔蠢彼小醜耳當折箠
而笞之如吾中原何且傳檄而定矣用底碧幢之績

遄觀赤烏之華江左有夷吾而復何憂允歸朝望中
國相司馬而無生事已折虜謀皇矣吾君偉哉此舉
某屬聞綸綍如拜麾旄人一天我獨二天覲重啖安
期之棗行百里半九十里適將熟楚戍之瓜寧少俟
於須臾幸毋忘於疇昔

賀劉寺丞

伏審夙戒麾符儼臨戟衛呈琅玕叫閭闔正聯星宿
之班羞崑崙薄蓬萊自求山水之郡此名此德甚盛
甚休恭惟玉篋黃鍾之函和瑤瑟朱絃之挺直雖不
為表擗於議論之際要自有公是非顧未嘗標置於
名氏之間此所謂真道學蚤策勲於翰墨乃課最於
簿書州縣之職徒勞人荐出即官之宰賢能之舉不

待次尚參計相之賓凡晉權萬貨之經與均會百工
之給皆未究其所蘊何厥聞之甚都龍左角為天田
肆陞華於九扈驟右駢者刺史訖自詭於一麾上若
曰古君子之儒時則入漢循吏之傳以去帝城不遠
耳冀潤九里而及京師然豈君相之意哉乃先一州
而後天下聞有迅召頤無疾驅某自守其迂見謂之
拙思昔中年之化今已在七不堪之中正復陽城之
生亦付之六太息而已過不自料勇為此來一用其
策之平平兩書其考之下下有人民有社稷久矣厚
顏為保障為蠶絲凜乎掣肘公既至止吾知免夫披
雲霧而覩青天敢忘賀宴為草木而到赤地或可逢
春

賀李參政

恭審誕揚制冊參秉政機當聖賢馳騫之時聿思元老覲道德安強之效迄底丕平簡在帝心於皇廟論恭惟養其氣以副大尊所聞而高明姚崇應變而宋璟守文兼負經綸之蘊元齡善謀而如晦能斷克成綜核之功自績武於樞庭茂結知於宸極明良千載仁義一言伊欲天下皆堯舜之民正以胷中有孔周之學會羽檄遠憂於丙枕宜鋒車趣駕於庚牌王曰歸哉舊弼爲中朝之望天其或者太平當今日之期端觀介圭入陪台袞共後巨川之濟式隆巖石之瞻泰階同符間兩社以爲公輔神鼎增重有一德以享天心傾聽白麻登延黃閣某親逢盛事思見熙辰甲

兵之問不至廟堂蓋邊臣之至願忠信之言可行蠻貊惟公相之所爲嘉與函生悉歸陶冶

賀李簽樞

恭審望尊書殿位峻機庭惟吉士勲相我國家師言允穆用真儒無敵於天下虜膽已寒於赫聖謨有嘉王佐恭惟以二典之書鳴治世以三館之學儀清朝非堯舜不陳於前大吾君之無過將文武未墜於地幸斯道之有傳仁義一言明良千載式慶風雲之會聿臨樞斗之躔遭時多難屬望尤切繫華夏蠻貊罔不率其孰使然今左右國人皆曰賢必能辦此曾何患乎蛇豕當自靖夫鯨鯢蓋天開奠枕之期維日望止戈之武言觀偉績敬紆褒綸軍旅俎豆之事嘗聞

之正有關於輕重大尉丞相之尊則等耳行兼佩於
安危某傳誦制函鈞陶化冶命將帥以衛國誓殫折
筮之勞修政事以攘夷傾聽借籌之畧具瞻巖石用
濟巨川

賀游禮書

恭審疏息曉殿正位春曹蜀第一人重見器能之諸
葛舜十六相最推典禮之伯夷朝有儒宗世知治象
恭惟藻藉五采之古作簫韶九成之正音言合稷契
謨合臯夔又罄忠嘉之沃窮則孔顏達則周召曾微
夷險之分自抱膝於隆中已傾心於天下乃班朝著
乃殿帥藩聲名隨風而流式慶明良之會議論決江
而下無非仁義之言丕揆國華屹爲時棟宗伯掌邦

禮諒新治世之彌文聖主得賢臣誕播鄉人之嘉頌
某欣聞綸綍相賀縉紳言觀孤鳳之暉敢贊雙魚之
素意之所屬言莫能殫

賀趙戶書

恭審進長地官增重天府六卿紫橐民部雖繁三輔
黃圖神京愈肅有偉綸函之播於昭黼座之知恭惟
奕矣銀潢粹然玉璞言語妙天下魯諸儒何以尚之
智略轅上前漢庭臣無出右者誕緝九畿之政密聯
八座之暉欲遷春貢於地輿豈折秋毫於戶版尚書
爲國喉舌允釐帝輦之浩繁執政猶吾股肱遙仰台
垣之峻極某想聞畫接傾溪辰猷聿瞻聽履之班竊
有彈冠之喜敢忘傳鯉如對厖犀

賀許兵書

恭審渙敷周誥晉陟夏卿祈父王之爪牙盍釐九法
尚書帝之喉舌式綜五兵國有人焉民胥悅矣恭惟
筆掃單于之萬騎曾吞禹貢之九河挹翰林主人撮
入花輶之直列文昌司馬聿高荷橐之班遭時多難
屬望尤切若曰用真儒而天下無敵其惟進有德而
朝廷自尊得頗牧於禁中今何憂乎蛇豕玩羗夷於
掌上將自靖夫鯨鯢言觀偉績之無前咸曰褒綸之
已後其得之傳誦私以忻愉式遘孤鳳之暉敢贊雙
魚之素有言粗淺莫旣精微

賀李吏書

恭審光奉贊書峻登文部思皇多士聿生綜核之朝

無競維入式董銓衡之選國有公是人能誦言恭惟
蔚然臯瓊之謨洋乎晁董之對金華勸講非堯舜之
道則不陳玉璽緘辭編詩書之冊而無愧茂昭帝簡
備極儒榮乃顯四選之權獨處六曹之長咸造在庭
而褒爲首已推名世之賢仰惟前代而訓厥官遄正
冢司之拜某欣傳郵置敢後牋函諒藻鏡之餘間流
電巖之迅矚嗣聞除目庸快夙心

賀王右司

伏審丕承帝簡密贊宰衡子大夫入覲王庭巍冠儒
科之一左右司學爲丞相進聯台宿之三式負重名
茲惟妙選竊仰省曹之叢委適遭時事之艱難邊檄
縱橫而有桀鷩之裔夷京輦尊嚴而有蕩焚之孽火

廟堂相語宗社爲懷是勤經濟之憂允賴彌綸之略
天將平治時乃疇咨恭惟文續古餘學到聖處以賢
良三策而爲舉首人快覩先起徒步數年而取封侯
上見嗟晚聿班台佐豈久卽潛歷觀政路之聯每補
侍臣之缺思皇寵渥遙卽禁塗某聞譽處之甚都讀
除書而相賀天下自此寧矣知省闈之有人主上注
意倚之想巖廊之無日其爲欣頌莫旣蘊悰

秋崖先生小藁卷之十三

秋崖先生小藁卷之十四

啓

代賀余寺丞

方岳

巨山

伏審捷音西上除目東來雪夜馳至蔡城不專羨於
李愬風聲走之泚水今復見於謝安否則孤城其殆
哉吾有此客亦重矣蓋自韃敢盜邊而凌中夏所謂
發不恤緯而憂宗周孰嬰其鋒徒得賣降之健將愈
肆其毒久輕效死之無人旣殘浮光而逞焉若曰安
豐特易耳氣吞堅壁夜合重圍不量羶裘貪得之愚
直有靴尖蹴破之意懼亡無日卻敵者誰自非某官
以國之蓋臣爲今之儒帥共話對床之風雨屢吐壯

懷誓清並塞之煙塵輒張怒髮則何以脫生靈於虎
口挫強虜之狼心上嘉乃勲休有成命某作爲凱樂
顯後班師寧失智高雖頭顱之可辨盡遜卻克何肝
膽之相知式對絲綸勉旃竹帛

代賀杜安撫

伏審渙發綸函晉登藩岳勲業聿高於淝水聲威誕
播於淮壖恭惟國之蓋臣今之儒帥崇詩書說禮樂
窺聖域之妙而探其心安邊境立功名關武夫之口
而奪之氣此所謂有用之學賴以濟多難之時故雖
鼙鼙之夜嗥蜩驚風鶴而宵遁肆放一札增重十連
帝曰俞哉有夷吾而何患功亦偉矣召季布而可知
某聞命云初愬風以喜兩淮猶左右手正資運掉之

勞九重披輿地圖更竚經綸之畧敢因慶幅泚贊壯
猷

代賀趙刑郎

伏審光奉紫泥之詔入踐白雲之司天地之德曰生
庶幾刑措祖宗以仁相授謹簡卽潛乃睠麟宗咨平
犴獄恭惟玉璫黃流之醲郁冰壺朱紘之勁清繇浙
以西有羨間平之經術維斗之北於皇齊魯之福星
正茲大厦之賀成端以小秋而召去民曰奪吾父矣
帝其得賢臣焉獨提丹筆之春已傳呂命徑荷紫囊
之橐聿矢臯謨某蚤所傾心喜而舞手贈以芍藥敢
不書子張之紳報之瓊瑤久欲聽鄭崇之履輕芹塵
瀆別楮昉陳

代賀傅右司

伏審渙發宸綸晉登臺轄左右司學爲丞相聖訓有
之天下事皆在都曹職任隆矣惟此名家之彥足爲
有國之華恭惟忠義相傳詩書自許思昔乃祖膝不
屈於穹廬至今裔夷膽尚寒於旄節此殆唐第一人
之李揆豈惟漢十九年之子卿天實鑒之代有聞者
顧此韞難之會孰釐叢委之司乃睠譽髦佐吾元老
密勿巖廊之邃相業在茲清華禁橐之嚴師言具矚
某猥分邊閫遙企朝班端覽暘暉幸際孤鳳凰之瑞
願受陰賜敢忘雙鯉魚之書

代賀黃檢詳

伏審密勿廟謨討論基命赤白囊之旁午渴聞帷幄

之籌東西府之同寅增重巖廊之勢一賢進矣四達
翁如恭惟博大而裕和高明而肅括文能附衆武能
威敵無兢維人退思補過進思盡忠不遐有佐帝曰
邊烽之未靖卿其樞極之是陪庶以贊萬微之幾且
將制千里之難蓋真儒用而天下無敵何憂狐兔之
群今有德進而朝廷益尊遄遣夔龍之武某逃聞出
綉喜欲振纓足食足兵皆願受其陰賜且耕且戰惟
肅稟於成謨

代賀韓檢正

伏審渙發綸函晉陪政路與大臣上下其議論相業
在焉惟吾儒明習於典章國是定矣永言雅望簡在
清衷恭惟忠義相傳風流是似惟先王佐中興之運

有大勲勞繫皇穹嘉貫日之精生賢輔佐言語妙於
天下智略湊於上前屬時多難光贊元老斷國論而
謀王體惟克彌綸騰茂實而蜚英聲遠觀經濟行踐
禁塗之邃睠言寵渥之新某竊仰令猷忻聞成命聖
賢相逢張治具不在茲乎日月獻納爲侍臣無出右
者敬修慶積式竢贊書

代賀史督相

伏審參持國柄董護戎昭江左有夷吾而復何憂正
資妙畧中國相司馬而無生事坐折遐衝天啓聖心
睠維王佐恭惟濟時以治安之策致主以太平之書
南鄭相北鄭相而譜世家豈特衣冠之盛大馮君小
馮君而難兄弟並關宗社之休薦紳竊仰其經綸旋

冕渴聞其論議夜下庚牌之召席前丙枕之安廟謨
獨斷於一言國勢重增於九鼎予惟克邁乃訓已罄
嘉猷天將降任是人遂陪政路肆颺大冊兼總全師
蓋宰相外撫四夷允賴精神之運惟天子明見萬里
迄成道德之威遠徯公歸丕承帝賚某猥縻捆寄莫
遑庭班瞻彼熊旂徒有執干戈之志已窮鼙鼓頽賡
洗兵馬之詩是開休顯之期式慶明良之會

代賀杜制置

伏審進班司府分捆藩垣謝元城淝水之勲彼酋其
遁裴度任淮西之寄我武維皇諒草木之皆兵後関
河之入貢恭惟以少陵之詩名而自比於稷契以阿
房之賦手而高論於唐虞精神之折遐衝不愆于素

謀慮之愔勅敵克壯其猶故能全孤城於百戰之餘
於此見真儒爲萬人之傑旣勒銘於丹地乃授鉞於
青冥顧惟風塵瀕洞之秋要有意氣激昂之暇平居
推赤心而置人腹其孰不懷緩急蹈白刃則得士情
何戰弗克矧天意之滅虜適歲星之照吳國豈賴盟
兵毋撤警惟事事備乃其無患願修軍旅之定規言
人人殊則罔成功更極賓僚之高選聿觀偉業丕對
殊褒某密邇鄰光驩傳帝賚闌以內闌以外喜盡寄
於爪牙陝以東陝以西賴相依於唇齒

代賀游吏書

伏審渙放一札晉長六卿尚書古之納言無易瑣闥
之拜治官周之冢宰獨專銓選之權國有人焉才無

遺者恭惟親傳伊洛之學妙摛河漢之辭蜀道難於
青天毓此山川之秀故國非有喬木凜乎文獻之尊
上嘗歷數西州之英曰孰可與東坡而並歎鶴山其
已矣訊蠶叢之渺然乃得公於草廬之中欲致治於
簡編之盛有謀猷入告于后共談虎觀之經非仁義
不陳於王屢却鸞臺之敕粵從人望擢冠禁塗惟茲
典選之班自昔奮庸之地前裴馬而後盧李豈專美
於唐人左稷高而右臯夔佇疇咨於舜典某述聞除
目坐隔邊頭能世俗書敢覬山濤之啓事爲朝廷喜
竊想鄭崇之履聲遡江以南維斗之北

代賀許兵書

伏審於皇周誥之華就正夏卿之位丈夫即爲真耳

何以假爲國人皆曰賢焉夫然後用維上所倚濟時之難恭惟太嶽之宗神山之秀議論度越諸子蔚爲當世之典刑文章自成一家夔絕尋常之畦逕粵代言於禁苑滋簡眷於宸襟乃躋甘泉法從之班誕緝周官司馬之政蓋文事必有武備烏可岐而二之今內寧猶多外憂孰能定于一者坐制此虜端在吾儒興言邊侵之日騷竊憤胡星之未賈頻年入塞妄意飲江脫非折箠而笞直欲投鞭而渡如曰舉天塹而與之共恐或不然要當立砥柱而爲之防庶幾其可惟士大夫毀家而紓楚國之難俾聖天子制撻而撻秦人之兵則吾免於魚乎不然憂未歇也厥有廟筭以張皇綱某敢誦所聞時以自壯真儒用而天下無

敵言觀帷幄之籌有德進而朝廷益尊端正鈞衡之柄其爲期嚮莫旣蘊悰

代賀蔣諫議

伏審簡自中宸擢居正諫粵躋橫榻得李勉而朝廷始尊斗上大坡用仲淹而士夫相賀蓋以久持天下之正其必能格君心之非求惟治亂之端在小人與君子此其消長之道非宰相則諫官肆吾祖宗立國以來盡洗秦漢諱言之習聽納之盛載籍所無是知累朝熙洽之休正賴諸老箴規之力茲實主上用公之至意豈但先生執政之緊頭恭惟質堅百鍊而愈精節貫四時而不改仕者皆嚴憚黯已消落瞻之姦帝曰無以易堯當有沃心之論竊窺聖德時憲天聰

雖艱難有甚於繇而恭儉本無於袞闕惟是外則
桀驚不臣之虜久矣鳴張內則器謹不靖之兵敢於
狙詐事孰大於此者時其條而上之非仁義不陳於
前可使主憂而臣辱有謀猷入告于后所願乾清而
坤夷某越在邊城莫瞻朝著稱慶曆者曰四諫尚能
賡祖徠之詩今陽城號爲一賢何待作昌黎之論敢
無動色傾聽嘉言

代賀林侍御

伏審出綸西掖執憲南床天子明明用臯陶而不仁
者遠矣王臣蹇蹇如行父見無禮者誅之茲得一賢
重增九鼎恭惟二典三謨之學問五音六律之辭章
觀經世之宏規雖伊管未能遠過讀責難之確論非

仁義不敢前陳適當不諱之朝夕立得言之地接武
夔龍遙羽鶴鷺綴赤墀供奉之班當道豺狼安問狐
狸凜白筆抨彈之志使顏跖忠邪之莫辨雖堯舜聰
明而柰何矧今士習之媮未明國是之定倖門如鼠
穴而不可塞弊事如蝟毛而不可爲外之則黠虜之
鳴張內之則驕兵之狙詐勿用小人必亂邦也誰當
共濟於艱難不有君子其能國乎時則渴聞於忠讜
願言密勿悉意敷云庶幾回事變於危急之秋或可
觀德化於湏臾之頃某逖居邊瑣欣誦宸綸有爭臣
者七人揣底臯謨之積舉明主於三代願聞說命之
篇敢不濡毫以需染牘

代賀李右史

伏審渙發龍綸晉登螭陛堯言布於天下宜載典謨
遷史藏之名山無慙筆削茲實帝王之盛豈惟儒學
之榮恭惟如樂九韶如鼎萬斛韜涵雅訓蓋平生無
未見之書刊落塵言有古人所不到之妙嘗讀梅亭
之藁喧傳薇省之詩所謂洗萬馬而空之直欲障百
川而東耳乃夾侍玉皇之香案俾共紬金匱之秘文
陳洪範九疇密贊吾皇之聖作春秋一藝襲爲有宋
之經偉哉真儒成此信史某瞻斗以北與江俱東雖
莫陪駕鷺班肅上賓榮之賀儻得與牛馬走願窺帝
典之暉倚聽褒綸別馳慶幅

代賀馬郎中

伏審進班郎省敷訓蕃房以六經淑天揖之親以九

式均地官之賦初傳除目允穆師言恭惟五常白眉
一時巨擘言議如周而有草茅之氣功名如援而無
惹苴之疑乃珥筆於華軒乃爲模於朱邸簡知之渥
寵數斯皇彌綸豈久於郎潛獻納遄躋於禁從某同
僚厚甚聞命躍如敢忘芹莢之羞庸致厦成之賀

代賀葉秘書

伏審對剔芝璽論選蓬山楊雄之校秘書恍驚昨夢
蘇軾之可著作甚補上心賁然來思升自此矣恭惟
曾吞雲澤手攬斗魁束三傳而抱遺經合是獲麟之
筆不十年而起徒步遄歸浴鳳之池人皆曰然恨見
之晚某舊親談塵慨想顛犀文不在茲旣爲吾道之
賀君子至止亦寫我心之思

代賀程常博

伏審擢從學省峻立頌臺八索九丘之書既重講席
五禮六樂之教其佐秩宗均爲極儒者之榮所謂妙
天下之選某屬聞誨範欣覩除綸夙夜寅清尚借藩
房之重日月獻納有開禁索之華於穆緒言等幾紆
監

代賀尹漕

伏審借才匠監將指神臯蕭相國轉漕關中蓋爲根
本之計范孟博澄清天下莫先輦轂之間上意則然
師言惟允某藐茲宗邸恃有使軺我獨二天無忘麟
趾之信厚畿方千里但瞻牡轡之光華無斃頌言等
祈涵在

代賀喬佑神

伏審天啓相門思深帝宸雖迫於典故姑俟快於祠
庭然咨爾家傳實贊襄於鼎路世嘉元老代有聞人
恭惟寶婺流輝金莖擢秀惟君牙乃祖成績紀于太
常惟魏公諸孫論議挺有風烈此豈但衣冠之盛盖
自關宗社之休奕矣譽髦踵于王父某逖聞綸綍懽
動縉紳曰學爲箕學爲裘文章特其餘者當用作霖
用作楫將相真有種哉近隔雲屏遙觀泥璽

代賀別尚書

伏審渙颺周誥晉陟夏卿圻父爲王瓜牙增重留都
之相寄尚書乃天喉舌仍參督相之軍謀大張天聲
聿寧江面恭惟肝膽一劔精神五兵袖有太平之書

真儒無敵於天下氣吞餘子之輩此虜已在於目中
屹然爲國之藩垣久矣簡知於旒宸適旄頭之騷屑
煩塵尾之指麾北有獫狁西有昆夷孰分憂於丙枕
出則股肱居則心膂逆趣駕於庚牌於赫皇威有吾
王佐某相期竹帛快覩絲綸一命再命三命而益恭
豈但曰接夔龍之武大書特書屢書而未已尚當賦
洗兵馬之詩粵若山瞻有如江水

代賀吳尚書

伏審中詔置郵上流開柵尚書乃天喉舌寢高曳履
之班祈父爲王瓜牙增重建旄之寄帝心簡在江面
聿寧恭惟學足以度越群公材足以康濟斯世前有
召父後有杜母孰知儒者之兵廉若鮑叔信若尾生

兼著仁人之勇當此邊氛之瀕洞深虞江介之繹騷
狼子無厭直曰投鞭而度耳虎臣如在必將折箠而
笞之顧瞻縉紳大夫之間妙有詩書元帥之選重國
九鼎維斗一人乃勤笳鼓之西出填琵琶之北武騎
千群而無所用聞胡膽之已驚使者四輩而趣之歸
想天顏之有喜某舊同手足今籍喉衿雖江左有夷
吾可無患矣然中國相司馬其孰愈乎引瞻泰巖飛
渡湓浦

代賀岳都丞

伏審通班邃閣導旨機庭惟雲漢昭回之章寶爲大
訓惟夙夜宥密之命厥有明謨併授傑才茲爲顯渥
蓋朝廷之成幾事所賴親臣而夷狄之亂中華無甚

由

今日孰有平戎之策我得本兵之賢綸綍初傳縉紳
相賀恭惟材足以濟斯世學足以窺古人君子是以
似之慨想背嵬之無敵王事誰其棘矣不圖武穆之
復生大書岳字之旗盡索虜庭之氣如使知中興四
將之有後雖欲加諸華一矢而莫能乃陪帷幄之謀
甚稱袞旒之意蓋淵雲之精筆妙墨豈但論思而已
哉彼秦楚之堅甲利兵直可笑談而却耳遙觀詔璽
徑踐政塗某望履無繇彈冠有喜焚香而對楹史每
嘆倦翁之可人仰天而問階符更審相公之何日瞻
斗以北與江俱東

代賀吳尚書

伏審峻躋武部肇建戎旃制梱號小朝廷密拱王畿

之近政職曰大司馬用提軍律之嚴海道江防國門
鼎重恭惟器能如諸葛亮而無其短賢良如董仲舒
而無其迂權則知變經則知常略具天人之三策元
難爲兄季難爲弟共推宇宙之兩吳故處之於上下
流之間殆不啻如左右手之眡蓋自古豈無於外患
而當今尤務於內寧乃睠北辰之居實據東南之會
統六師以平邦國豈但攘夷潤九里而及京師莫先
尊主乃開大柵以鎮近畿式遄竹帛之暉入覲宸旒
之邃某手足何異唇齒相依念有德進而朝廷愈尊
常恐追鋒之召今真儒用而天下無敵願聞解甲之
期宏濟多難厥在茲舉

代賀黃少卿

伏審升華邃閣臨鎮雄藩無愧六一翁方過間而式
午木乃聞二三子至守闕而留陽城是行偉哉有餘
榮矣獨念某聿親講部遽遠師資老聃出函谷關悵
莫瞻於紫氣馬融上廣成頌徒結戀於絳帷無數顧
馳等幾監在

代賀史尚書

伏審光奉明綸趣還起部謀猷入告于后久探禹穴
之竒器械咸精其能更核漢朝之實增華曳履簡在
凝旒某藐是宗維欣聞宸綍君牙乃祖乃父惟帝念
哉周公之美之才有世臣矣未央慶緒等覬監紆

代賀魏侍郎

伏審渙別書贊進貳憲曹民自得於湖山久奏吳門

之最帝慨思於人物趣歸漢殿之班豈得詳刑斯皇
殊綍某不勝燕賀敢後魚傳致治幾成康坐想措刑
之盛使君爲堯舜諒懷濟世之忠無數頌言切惟監
在

